

337

et aquam con la vita su la ponta d'un ago in cao dil mondo. E perchè fo questa mia folia solo per sperar de averne a rezever oltra la zerta promesa de ducati cento al mèxe gran merito, come in molti pi'aventurati de mi e con assai menor efecti ò veduto, me mixi su questa fede in camino, e tanto di volentiera, quanto che la sublimità de quel santissimo Prinzipo, che per sua inata clemenzia me ama, me persuadeva che vegnir volesse a servir, con dirme: «Non sa' tu, chi è mandà a sti bexogni per el Consegio de' X, come i son meritadi?» Basta, mi lasai conselgiar, ita che in sie zorni me fizi presto e parti in sifata bon hora che in zorni . . . 6 cavalcanti zonsi a Londra, dove io son; che non so qual cavalaro de la mia età, sesanta do anni che allora aveva, vi fuse venuto con i contrari che vi veni, cavaleando come incognito, vestito zorno e note; dal che son rimasto strupiado et impedimentato, che non sarò mai pi' omo integro come era mi. Cascò sopra el monte de San Gotardo el caval soto, in tempo de note, caminando su giazza, et detemi sopra la gamba destra tal colpo, ch'el mi la sfese a longovia l'oso per tre deti de figura, seperando la carne ch'el si vedeva l'oso schieto; et per mia ventura, cussi com'el cascò a banda destra el cazea verso senestria, andava a basso in un prezipizio che mai pi' se n'averio sentito de mi novele; et Dio sia laudato. Vero, che avea do lanterne e homeni che le portava avanti volendo azelerar el camino, tanto che Dio volse zunsi alozamento, che fo la note de carlevar, che per esser stai tardi non trovai altro cha pan e vin a zena; me segnai mi medesimo la gamba. La mattina seguente, zercha a terza, fui a Basilea, che fo el primo dì de quaresema, et lì montai per vegnir per aqua et il Ren, che è grossissimo fiume sopra una barcha, che andando per quello in una granda, carga de marcanzie con i miei cavali suso, trovasemo un zocho sott'acqua in mezo el fiume apresso una iara seca in grandissimo torente, dove questa barca urtò co nel fianco, essendo noi fra el zoco e la iara, un tal colpo, che la se averzè, acostandose da la gran bota a la iara, e tutti prestì se ne saltamo con i cavali su quella e la barca fu piena d'acqua, per esser come quelle burchielle che portano li ovi a Venezia, senza nè pegola, nè sturà d'agudi. Basta che tutta quella notte stesemo a contar le ore, et io pezo cha tutti per la gamba che m'avea bagnado. Or *Laus Deo*, la barcha se potè chonzar, et se condussemo in Arzentina a salvamento. Vi ò voluto narar parte di la mia fortuna: basta che per tutto, essendo intrato in sospetto, me bisognava a tutti render conto quello che andava fazando; non bisognava però smarisse in

faza, et cussi che alcun zorno era passato quando per inglese come per scozese, et cussi parendomi per segurtà mia, si perchè era venuto in sospeto de l'Imperator, dizendo andar a la chorte, che era stà mandato per una causa scrila a sua Cesarea Maiestà qual era ai confini de la Franza. Et con questo m'andai per alcuni zorni a mio muodo con sto mezo, e come hebi passato el locho dove era, e a chi me domandava, diceva veguir da la chorte, che come homo dil re d'Ingaltera iera per andar in Ingaltera, et uscii però con un'altra choverta hassà ben fin appresso Chales, qual è un castello in Pichardia su la terra ferma dil re d'Ingaltera; ma 'l pi' difficultà alimentar in quello che avesse avuto tuto el viazo, per esser el paexe avertò per tutto. Ghè molti castelli de franzesi su quelli confini, che è sempre con gran garde per suspetto de Ingaltera, basta che una mattina da 3 compagnie de franzesi per tre volte fui ritenuto, avendomi ad interrogare chi io era et ziò che mi voleva a dō mia et quando ad un mio apresso Chales, rispondendo superbamente chome un englix, et che vegniva de Franza, mandato dal mio patron, per risposta. Qui si restò et n'andò a caxa, tanto che mi lassò andar, ma pure a longe seguitandomi, con esse caute fino ad un tratto de freza apresso lo mare de Chalixe, dove trovai un barzoto englexe remado che era per vegnir qua; mi misi sopra quello con mei cavalli, et per un zorno et una notte, zonzesemo qui in Ingaltera con salvamento. Sia Dio laudato. Ho havuto a caro narrarvi ogni successo, per farvi intender con quanto piaser son venuto per questo paexe, et come seguro.

Magnifico fradello, zonto a Londra, vardati che ambassaria è stata la mia, e che quando mi partii da Venexia, per non esser voluto a suspetto non portai con me nulla, salvo quel che havia indosso, che fo do chamixe una sopra l'altra, con zerto vestito all'englexe tarmado e repezzato e nì borsetta nì tashin, nì chosa de questo mondo; basta che, come zonto qui, convinzi da nuovo tutto vestirmi da capo ai piedi di ambascadore venezian, cussi e nemenò che se allora fusse venuto al mondo, comprando il soldo per 24 bagattini. Qui non se fa panni di seda; ma useno quelli tutti da Zenoa, Fiorenza e Lucha; cosse dolorosissime e triste, non poter comprar di quel che poteva aver e serar li prezii. Pensati come son vestito; quando sarò a Venezia, la veste de chi me saranno d'apresso sarà de seda e le mie saranno de frixo; tutto da nuovo ho comprà per la ponta del danaro con grandissimi incomodi, et pezo che le mie